

Allannguutissatut siunnersuut

uunga

Siunnersuut: Ilisimatusarfik pillugu Inatsisartut inatsisissaat nr. xx, xx.x-imeersoq

Aappassaaneerinermi Naalakkersuisunit saqqummiunneqartoq.

§ 11-mut

1. Imm. 2 imatut oqaasertalerneqassaaq:

"Imm. 2. Naalakkersuisut toqqartassavaat avataanit ilaasortat Ilisimatusarfiup pituttuisuunngitsumik innersuussuteqarneratigut. Ilaasortat toqqarneqartassapput inuttut piginnaasaqarnerat tunngavigalugu ukiuni 4-ni ilaasortaasussanngortillugit. Toqqaanermi pingartinneqassapput suliamut inuttullu pisinnaasat aamma suliffinnik kiisalu ilisimatusarnikkut ilinniartitaanikkullu avatangiiserisanik inerisaanermik misilittakkat, ajornanngippat nunarsuarmut tamarmut sammisut. Toqqagaaqqittoqarsinnaavoq."

§ 12-imut

2. Imm. 3 imatut oqaasertalerneqassaaq:

"Imm. 3. Rektori aamma rektorip tullersortaa minnerpaamik kandidatitut ilinniarsimasuussapput Ilisimatusarfiup ilinniagassatut sammisaasa arlaanni aamma Kalaallit Nunaanni pissutsinik ilisimasaqassapput ilinniartitaanermillu pissutsinik paasisimasaqassallutik. Aammattaaq rektori ilisimatusarnermik ilinniartitaanermillu sammisaqarfinnik aqutsinermik inerisaanermillu misilittagaqassaaq."

§ 19-imut

3. Aalajangersagaq imatut oqaasertalerneqassaaq:

"§ 19. Institutimi aqutsisoq aqutsisuuffissaminut naapertuuttumik ilinniagartuujussaaq, ilinniagassami ilinniarsimasamini, ilinniartitsinermillu misilittagaqassalluni."

Inatsisissatut siunnersuummut oqaaseqaatit

Oqaaseqaatit nalinginnaasut

Allannguutissatut siunnersuut allannguutininik Inatsisartut Kultureqarnermut Atuartitaanermullu Ataatsimiititaliaata siunnersuutip aappassaaneerseqarneranut atatillugu isumaliutissiissutaani tunngavilerneqartunik allannguutininik imaqarpoq. Partiini amerlanerussuteqartut Siumumeersut, Atassummeersut Inuit Ataqaatigiinneersullu inatsisissatut siunnersuummi anguniarneqartut taperserpaat.

Ilisimatusarfiup siulersuisuisa katitigaanerat Kultureqarnermut Atuartitaanermullu Ataatsimiititaliap eqqummaariffigisimavaa. Universitetsråd-imut maanna qullerpaamik aqutsivittut atuuttumut siulersuisut taartaanissaannik Naalakkersuisut siunnersuuteqarnerat Ataatsimiititaliap isumaqatigaa. Naalakkersuisut siulersuisunut ilaasortanik avataaneersunik toqqaasarnissaasa Ilisimatusarfimmit pituttuisuunngitsumik innerssuussut aallaavigalugu pisarnissaat Ataatsimiititaliap ilanngullugu pingaartuutippaa. Tamanna tunngavigalugu Naalakkersuisut ataatsimiititaliap isumaqatigiittup kissaataa naapertorlugu allannguutissatut siunnersuummik ilanngussipput.

Ataatsimiititaliami amerlanerussuteqartut Siumumeersut, Atassummeersut Inuit Ataqaatigiinneersullu rektorip aamma rektorip tullersortaata minnerpaamik Ilisimatusarfimmi fagini ilinniartitsissutigineqartuni kandidatit ilinniarsimassuunissaa pillugu allannguutissatut siunnersuummik saqqummiussipput. Amerlanerussuteqartut pineqartut aamma institutimi aqutsisup aqutsisussaaffimminut naapertuuttumik ilinniagartuujunissaa pillugu allannguutissatut siunnersuummik saqqummiussipput.

Allannguutissatut siunnersuut pisortanut namminersorlutilluunniit inuussutissarsiortunut aningaasatigut allaffissornikkullu kinguneqaateqassanngilaq.

Aalajangersakkanut ataasiakkaanut oqaaseqaatit

nr. 1-mut

Aalajangersakkamik allanngortitsinerup nr. 1-mik ilanngussineq kinguneraa, tamatumalu kingornatigut Naalakkersuisut Ilisimatusarfimmit pituttuisuunngitsumik innersuussuteqarneq aallaavigalugu siulersuisunut ilaasortanik avataaneersunik toqqaasassapput.

Siulersuisunut ilaasortanik avataaneersumik pituttuisuunngitsumik innersuussuteqarneq ima paasineqassaaq Naalakkersuisut sukkulluunniit Ilisimatusarfimmit innersuussutigineqanngitsunik siulersuisuni ilaasortanik toqqaasinnaasut.

nr. 2-mut

Rektorip akuerisaasumik ilisimatusartuunginnissaa, taamaattorli rektorip rektorillu tullersortaata Ilisimatusarfiup fagiini minnerpaamik kandidatiunissaat aammalu Kalaallit Nunaanni pissutsinut ilisimasaqartuullunilu ilinniartitaanermi tunngasunik ilisimasaqarnissaa allannguutissatut sinnersuutigineqartup kinguneraa.

Rektorip rektorillu tulliata minnerpaamik Ilisimatusarfiup fagiisa ilaanni kandidatiunissaat qulakkeerniarlugu allannguutissatut siunnersuusiortoqarpoq. Rektoritut rektorillu tullersortaanik akuerisaasumik ilisimatusartuunngitsunik, taamaattorli kandidatitut naleqquttumik ilinniagaqartunik, ilinniartitsinermullu tunngasuni ilisimasaqarlutillu ilisimatusarnermi ilinniartitsinermullu tunngasuni aqutsinermik ineriartortitsinermillu misilittagalinnik toqqaaniarnermi mattussinnginnissaq anguniarlugu aalajangersagaq manna ilanngunneqarpoq.

nr. 3-mut

Institutini maanna pisortaausut pisortanngorumaartussallu fagiminnut naapertuuttumik ilinniagartuujunissaat institutinilu aqutsisut fagiminni ilinniartitsinermik misilittagaqarnissaasa qulakkeerneqarnissaa allannguutissatut siunnersuutip kingunerissavaa.

Aammattaaq atorfinissutaasinnaasunik ilinniartinnit aqutsisut kiisalu institutini pioreersuni maanna aqutsisut institutini pisortatut atuutiinnarsinnaanerannut mattunneqannginnissaat allannguutissatut siunnersuutigineqartup qulakkiissavaa.